



ევროკავშირი  
საქართველოსთვის  
The European Union for Georgia



საგრანტო კონკურსი რეგიონული საზოგადოებრივი ორგანიზაციებისათვის:

## სექტორთაშორისი პარტნიორობის ხელშეწყობა

### კონკურსის მოკლე აღწერა და პირობები

#### წინასიტყვი

ევროკავშირის მიერ დაფინანსებული პროექტი "სამოქალაქო საზოგადოების განვითარების ინიციატივა" მიზნად ისახავს საქართველოში სამოქალაქო საზოგადოებისათვის არსებული გარემოს გაუმჯობესებას, სამოქალაქო საზოგადოების ორგანიზაციების გაძლიერებას, ბენეფიციართა მიმართ მათი ანგარიშვალდებულების გაზრდასა და სხვა მონაწილეებთან კავშირების გაფართოებას.

პროექტს ახორციელებს კონრად ადენაუერის ფონდი (KAS) და ოთხი ქართული არასამთავრობო ორგანიზაცია - სამოქალაქო საზოგადოების ინსტიტუტი (CSI), კონსულტაციისა და ტრენინგის ცენტრი (CTC), საქართველოს სტრატეგიული კვლევებისა და განვითარების ცენტრი (CSRDG), დაგანათლების განვითარების და დასაქმების ცენტრი (EDEC).

პროექტის „სამოქალაქო საზოგადოების განვითარების ინიციატივა“ მიზნებია:

1. სამოქალაქო საზოგადოების ფინანსური მდგრადობის გაზრდა დაფინანსების წყაროების გამრავალფეროვნებით, მათ შორის სახელმწიფოსა და კერძო სექტორის მონაწილეობით ხელსაყრელი საგადასახადო გარემოს შექმნით, ასევე მოხალისეობის წახალისებით.
2. სამოქალაქო საზოგადოების შესაძლებლობების, ანგარიშვალდებულებისა და სანდოობის გაზრდა, რათა მათ უკეთ წარმოადგინონ ფართო საზოგადოების პოლიტიკური, ეკონომიკური, სოციალური და კულტურული უფლებები.
3. სამოქალაქო საზოგადოების მედიასთან, ბიზნესთან და ადგილობრივ ხელისუფლებასთან უფრო აქტიური თანამშრომლობით სამოქალაქო ჩართულობის გაზრდა რეგიონებში.
4. სამოქალაქო საზოგადოების ღონისძიებებისა და ინიციატივების მხარდაჭერა ეროვნულ და ადგილობრივ დონეებზე საჯარო პოლიტიკის სფეროში, განსაკუთრებით ევროკავშირთან ასოცირების პროცესში მიმდინარე რეფორმების თვალსაზრისით.

#### საგრანტო კონკურსის მიზანი

საგრანტო კონკურსის მიზანია საქართველოში კორპორაციული სოციალური პასუხისმგებლობის (CSR) კონცეფციის პოპულარიზაცია და სხვადასხვა სექტორს შორის თანამშრომლობის კულტურის დამკვიდრება, რაც, თავის მხრივ, ხელს შეუწყობს რეგიონის მდგრად განვითარებას.

#### საგრანტო კონკურსის ამოცანა:

- სექტორთაშორისი პარტნიორობის ხელშეწყობა საზოგადოებრივი ორგანიზაციების, ბიზნეს კომპანიებისა და ადგილობრივი ხელისუფლების მიერ ერთობლივად განხორციელებული ინიციატივების მხარდაჭერით.



## საკვალიფიკაციო მოთხოვნები:

საგრანტო კონკურსში მონაწილეობა შეუძლია საქართველოში რეგისტრირებულ და მოქმედ რეგიონულ საზოგადოებრივ ორგანიზაციებს ან მათ კოალიციებს<sup>1</sup>.

საპროექტო წინადადება უნდა აკმაყოფილებდეს შემდეგ მოთხოვნებს:

- საპროექტო წინადადებაში აღწერილი პრობლემა/საკითხი უნდა შეესაბამებოდეს ადგილობრივ საჭიროებებს და კარგად უნდა იყოს დასაბუთებული.
- პრობლემის მოგვარებისათვის შემოთავაზებული მეთოდოლოგია სწორად უნდა იყოს შერჩეული და კარგად დასაბუთებული. უპირატესობა მიენიჭება ინოვაციურ მიდგომებს.
- პროექტის განხორციელებით მიღწეული შედეგი მდგრადი და განმეორებადი უნდა იყოს.
- პროექტის ბიუჯეტი უნდა იყოს რეალისტური და ხარჯთეფექტური.
- პროექტის თანამონაწილე უნდა იყოს ბიზნეს კომპანია/კომპანიები; თანამონაწილეობის ფორმა შეიძლება იყოს ფულადი და არამატერიალური (უპირატესობა მიენიჭება ფულად თანამონაწილეობას), რაზეც აპლიკანტმა უნდა წარმოადგინოს საგრანტო წერილი. თანამონაწილეობა უნდა შეადგენდეს გაცემული გრანტის არანაკლებ 10%.<sup>2</sup>

## შერჩევის კრიტერიუმები:

საპროექტო განაცხადებს განიხილავს და შეფასებს საქართველოს სტრატეგიული კვლევებისა და განვითარების ცენტრის (CSR DG) მიერ შექმნილი საგრანტო საკონკურსო კომისია, რომელიც დაკომლექტებულია პროექტის განმახორციელებელი ორგანიზაციების წარმომადგენლებითა და მოწვეული ექსპერტებით.

აღნიშნული კომისიის მიერ განაცხადების განხილვა და შეფასება მოხდება შემდეგი კრიტერიუმების მიხედვით:

	შეფასების კრიტერიუმი	ქულა
1	პრობლემის აქტუალობა	20
2	პროექტის მეთოდოლოგიის ეფექტურობა	20
3	პროექტის შედეგების მდგრადობა და განმეორებადობა	20
4	ბიუჯეტის ხარჯთეფექტურობა	20
5	განმცხადებელი ორგანიზაციების გამოცდილება პროექტის მართვისა და თემატური კუთხით	20
სულ:		100

თანაბარი ქულების შემთხვევაში, საგრანტო საკონკურსო კომისია უპირატესობას მიანიჭებს იმ საპროექტო განაცხადებს, რომელთა წარმდგენ ორგანიზაციებს:

- პროექტის განხორციელებისათვის ბიზნეს კომპანიის გარდა თანამონაწილეობა ექნებათ მოძიებული თვითმმართველი ორგანოებიდან, სხვა საჯარო უწყებებიდან და ა.შ.
- პროექტის განხორციელებისათვის მოძიებული თანამონაწილეობის წილი მოთხოვნილზე მეტი იქნება.
- აქვთ გამოცდილება მცირე და საშუალო ბიზნესთან ერთობლივი ინიციატივების განხორციელებაში;
- მონაწილეობა აქვთ მიღებული CSR DG-ის მიერ ორგანიზებულ ტრენინგებში კორპორაციული სოციალური პასუხისმგებლობისა და სექტორთაშორისი თანამშრომლობის თაობაზე;

<sup>1</sup>კოალიციის შემთხვევაში განაცხადის შემომტანი არის ერთი ორგანიზაცია, ხოლო კოალიციის ყველა სხვა წევრთან ფორმდება საპარტნიორო ხელშეკრულება, რომელშიც ცხადად არის განსაზღვრული თითოეული ორგანიზაციის ფუნქცია-მოვალეობები. კოალიციის შემთხვევაში, საპროექტო განაცხადთან ერთად წარმოდგენილი უნდა იყოს რწმუნებულება, იხ. დანართი 3.

<sup>2</sup>პროექტის განხორციელების ეტაპზე ბიზნეს კომპანიის მხრიდან თანამონაწილეობის პირობების დარღვევისას, პროექტი გარკვეული ვადით შეჩერდება ახალი პარტნიორის მოძებნამდე. თუ ამ ვადაში ვერ მოხერხდა ახალი პარტნიორის მოძიება, საგრანტო ხელშეკრულება გაუქმდება.

საბოლოო გადაწყვეტილების მიღებამდე საგრანტო კომისიას უფლება აქვს, განმცხადებელი ორგანიზაციიდან მოითხოვოს დამატებითი ინფორმაცია და/ან განახორციელოს ადგილზე ვიზიტი.

## საგრანტო პროექტის ხანგრძლივობა და დაფინანსება

პროექტის ხანგრძლივობა არ უნდა აღემატებოდეს **10 თვეს**. საგრანტო თანხის მაქსიმალური ოდენობა (თანამონაწილეობის გარეშე) შეადგენს **30,000 ლარს (დღგ-ს გარეშე)**.

### დაბეგვრა:

მიღებული გრანტით დღგ-ს თანხა არ ანაზღაურდება. შესაბამისად, თუ გრანტით მიღებული თანხა დაიხარჯა დღგ-ზე, გრანტის მიმღებმა ორგანიზაციამ იგი დადგენილი წესით უნდა გამოითხოვოს (დაიბრუნოს) საგადასახადოდან. პროექტის ხარჯების საბოლოო ანგარიში CSRDG-ის უნდა ჩაბარდეს დღგ-ს გარეშე.

*CSRDG არ ანაზღაურებს კონკურსში მონაწილის მიერ საგრანტო განაცხადის მომზადებისა და წარმოდგენისათვის გაწეულ ხარჯებს, მიუხედავად იმისა, შეირჩევა თუ არა მისი განაცხადი.*

## განაცხადების წარდგენის პროცედურა

დაინტერესებულმა ორგანიზაციებმა განაცხადის სრული პაკეტი უნდა წარმოადგინონ ქართულ ენაზე ელექტრონული ფოსტის შემდეგ მისამართზე: [csrdg.cssigrants@gmail.com](mailto:csrdg.cssigrants@gmail.com)

გთხოვთ, სათაურის ველში აუცილებლად მიუთითოთ **“GrantCSSI\_2019”**. განაცხადის გამოგზავნის შემდეგ მიიღებთ საპასუხო წერილს იმის თაობაზე, რომ თქვენი აპლიკაცია მიღებულია.

განაცხადის მიღების ბოლო ვადა: **2019 წლის 18 ივლისი, 18:00 საათი**.

### განაცხადის სრული პაკეტი მოიცავს:

- **პროექტის განაცხადი**- ელექტრონული ვერსია Word-ის ფორმატში.  
ასევე, განაცხადის ბოლო გვერდი ბეჭდით და ხელმოწერით დამოწმებული, დასკანერებული JPG ან PDF ფორმატში.
- **დანართი #1 - პროექტის საქმიანობის გეგმა**, ელექტრონული ვერსია ექსელის ფორმატში.
- **დანართი #2 - დეტალური ბიუჯეტი**, ელექტრონული ვერსია ექსელის ფორმატში.
- **დანართი #3 – რწმუნებულება (მხოლოდ კოალიციის შემთხვევაში)**.
- **თანამონაწილეობის გარანტია**, რომელიც წარმოადგენს საგრანტო განაცხადის განუყოფელ ნაწილს; თანამონაწილეობის შესახებ თანხმობის წერილი თანამონაწილეობის ფორმის/ოდენობის მითითებით პარტნიორი კომპანიიდან (და ადგილობრივი თვითმმართველობის ორგანიზებიდან) ხელმოწერილი და დათარიღებული, დასკანერებული JPG ან PDF ფორმატში.
- **საგრანტო პროექტის განმახორციელებელი გუნდის ძირითადი წევრების რეზიუმეები (CV)**; შესაბამისი კვალიფიკაციის დამადასტურებელი საბუთები, მ. შ. კორპორაციული სოციალური პასუხისმგებლობის და სექტორთაშორისი თანამშრომლობის შესახებ ტრენინგებში მონაწილეობის სერტიფიკატები;
- **მონაწილე ორგანიზაციების ამონაწერი სამეწარმეო რეესტრიდან**.

დაგვიანებით წარმოდგენილი და არასრულად შევსებული სააპლიკაციო ფორმები არ განიხილება.

ამ კონკურსზე პროექტის წარმოდგენით მონაწილე ორგანიზაციები ადასტურებენ, რომ წარმოდგენილი პროექტი მხოლოდ მათი ნამუშევარია. კონკურსის დროს მიღებულ დოკუმენტებს CSRDG-ი მხოლოდ განხილვის მიზნით გამოიყენებს და არ გაუზიარებს გარეშე პირებს ან ორგანიზაციებს, გარდა საქართველოს კანონმდებლობით გათვალისწინებული ან პროექტის დამფინანსებლის მოთხოვნის შესაბამისად განსაზღვრული შემთხვევებისა.

## საკონტაქტო ინფორმაცია

დამატებითი ინფორმაციისათვის შეგიძლიათ:

- დაგვიკავშირდეთ ელექტრონული ფოსტის საშუალებით შემდეგ მისამართზე:  
csrdg.cssigrants@gmail.com
- დაგვირეკოთ ტელეფონზე: 032 2 39 90 19

საკონტაქტო პირი: სალომე ხუციშვილი, გრანტების მენეჯერი